



Obraćanje supervizora za Distrikt Brčko, Brucea G. Bertona, na ceremoniji obilježavanja Dana Distrikta Brčko, 8. marta

Gospodo gradonačelniče, zamjeniče gradonačelnika, predsjedavajući, zamjeniče predsjedavajućeg, ambasadore Wigemark, dame i gospodo,

Uvijek je zadovoljstvo biti u Brčkom, posebno osmog marta. Želim da čestitam Dan Distrikta svim građanima Brčkog. Kao što mnogi od vas znaju, osmi mart također je i Međunarodni dan žena pa želim istovremeno istaći i ogromni doprinos koji su žene Brčkog i Bosne i Hercegovine dale ovoj zajednici i ovoj zemlji.

Također želim iskoristiti ovu priliku da istaknem prisustvo još dvije osobe u publici. Naravno, moram predstaviti svog šefa, visokog predstavnika Valentina Inzka, čije godine rada govore o njegovoj posvećenosti ovoj zemlji i njenim građanima. Drugo, čast mi je predstaviti vam ambasadora Clintia Williamsona, novog predsjedavajućeg arbitra Arbitražnog tribunala za Brčko. Ambasador Williamson ima veliki ugled i kao diplomata i kao specijalni savjetnik američkog predsjednika, te veliko iskustvo na Zapadnom Balkanu. On će biti od velikog značaja u našim zajedničkim naporima i zajedničkoj želji da imamo stabilan, održiv i prosperitetan Distrikt Brčko.

Za građane i izabrane predstavnike Brčkog, Dan Distrikta je prilika da se obilježe postignuća ove jedinstvene zajednice, ali i prilika da se razmisli o naučenim lekcijama i o radu koji još treba da se završi. Kroz zajedničke napore vlasti i građana Distrikta, i uz jaku i nedvojbenu podršku međunarodne zajednice, Distrikt Brčko je prešao dug put od ratom obilježene zajednice do primjera uspješnih reformi u brojnim oblastima, primjera od kojeg drugi u Bosni i Hercegovini mogu puno toga naučiti.

Kada govorimo o najskorijim postignućima, posebno bih pohvalio profesionalnu organizaciju lokalnih izbora i brzo formiranje vlade koje je uslijedilo. Želim čestitati novim zvaničnicima i pozvati ih da rade dosljedno, konstruktivno, efikasno i u najboljem interesu institucija i građana Distrikta. Vaša odgovornost je velika, a to je da se održi politička stabilnost i kohezija Distrikta, kao i opredjeljenje Brčkog za demokratiju, multietničnost i toleranciju.

Bio sam u Brčkom prije nekoliko sedmica, kada sam se sastao sa članovima Civilne zaštite i Službe spašavanja Distrikta Brčko. Njih želim istaći, jer oni predstavljaju odličan model saradnje između vladinog i nevladinog sektora, koji može poslužiti kao model i ostatku zemlje. Njihov jedini interes i svrha je da pomažu građanima, što se pokazalo i tokom poplava 2014. godine. Duboko sam zahvalan i impresioniran njihovim radom, koji mi je predočen tokom moje posljednje posjete. Njima nije bilo važno da li ste muškarac ili žena, Bošnjak, Hrvat ili Srbin, pa čak ni da li ste građanin BiH. Jedino što je bilo važno bilo je to da je ljudima trebala pomoći i oni su im je pružili.

Za sve koji su izabrani i imenovani u ovom mandatu, oni su divan primjer kako na prvo mjesto treba staviti interese zajednice. Vjerujem – i očekujem – da ćete nastaviti tim putem. Također, vjerujem – i očekujem – da ćete ostati opredijeljeni za put reformi.

Danas Distrikt ima puno toga da slavi, ali i puno toga da uradi: vladavina prava, ekonomija i obrazovanje su ključne oblasti u kojima se mora postići dalji napredak. Ohrabruje me što čujem da su te oblasti na istaknutom mjestu u programima rada Vlade i Skupštine. Uspješnost vašeg mandata mjeriće se vašim uspjehom u ovim oblastima. Međunarodna zajednica je spremna da vas podrži u vašim naporima. Iako je njena uloga u Brčkom evoluirala, međunarodna zajednica ostaje opredijeljena za Distrikt, opredijeljena da štiti njegovu stabilnost i održivost Brčkog i njegovih institucija.

Hvala vam na vremenu.